

欽
定
全
唐
文

欽定全唐文卷一百四十三目錄

李百藥 二

封建論

化度寺故僧邕禪師舍利塔銘

唐故都督徐州五州諸軍事徐州刺史臨淄定公

房公碑

隋故益州總管府司馬裴君碑銘

并序

太穆皇后哀冊文

欽定全唐文卷一百四十三

李百藥 二

封建論

臣聞經國庇民王者之常制尊主安上人情之本方思闡
理定之規以宏長代之業者萬古不易百慮同歸然命歷
有賒促之殊邦家有理亂之異遐觀載籍論之詳矣咸云
周過其數秦不及期存亡之理在於郡國周氏以鑒夏殷
之長久遵黃唐之並建維城磐石深根固本雖王綱弛廢
而枝幹相持故使逆節不生宗祀不絕秦氏背師古之訓

棄先王之道踐華恃險罷侯置守子弟無尺土之邑兆庶
罕共理之憂故一夫號呼七廟隳圯臣以爲自古皇王君
臨宇內莫不受命上元飛名帝籙締構遇興王之運殷憂
屬啟聖之期雖魏武攜養之資漢高徒役之賤非止意有
覬覦推之亦不能去也若其獄訟不歸菁華已竭雖帝堯
之光被四表大舜之上齊七政非止情存揖讓守之亦不
可固焉以放勳重華之德尚不能克昌厥後是知祚之長
短必在天時政或盛衰有關人事宗周卜世三十卜年七
百雖淪胥之道斯極而文武之器猶存斯則龜鼎之祚已

懸定於杳冥也至使南征不返東遷避逼禋祀如綫郊畿
不守此乃陵夷之漸有累於封建焉暴秦運短閏餘數鍾
百六受命之主德異禹湯繼世之君才非啟誦借使李斯
王綰之輩咸開四履將閭子嬰之徒俱啟千乘豈能逆帝
子之勃興抗龍顏之基命者也然則得失成敗各有由焉
而著述之家多守常轍莫不情忘今古理蔽澆淳欲以百
王之季行三代之法天下五服之內盡封諸侯王畿千乘
之間俱爲采地是則以結繩之化行虞夏之朝用象刑之
典治劉曹之末紀綱弛紊斷可知焉鑿船求劍未見其可

膠柱求音彌所多惑徒知問鼎請隧有懼勤王之師白馬
素車無復藩籬之援不悟望夷之釁未甚羿浞之災旣罹
高貴之殃寧異申繒之酷此乃欽明昏亂自革安危固非
守宰公侯以成興廢且數世之後王室浸微始自藩屏化
爲仇敵家殊俗國異政強凌弱眾暴寡疆場彼此干戈日
尋狐貍之役女子盡鬻峕陵之師隻輪不返斯蓋畧舉一
隅其餘不可勝數陸士衡方規規然云嗣王委其九鼎凶
族據其大邑天下晏然以治待亂何斯言之謬也而設官
分職任賢使能以循良之才膺共治之寄刺郡分竹何代

無人至使地或呈祥天不愛寶民稱父母政比神明曹元首方區區然稱與人共其樂者人必憂其憂與人同其安者人必拯其危豈容委以侯伯則同其安危任之牧宰則殊其憂樂何斯言之妄也封君列國藉慶門資忘其先業之艱難輕其自然之崇貴莫不世增淫虐代益驕侈自離宮別館切漢凌雲或形人力而將盡或召諸侯而共落陳靈則君臣悖禮共侮徵舒衛宣則父子聚麀終誅壽朔乃云爲已思治豈若是乎內外羣官選自朝廷擢士庶以任之澄水鏡以鑒之年勞優其階品考績明其黜陟進取事

切砥礪情深或俸祿不入私門妻子不之官舍頒條之貴
食不舉火剖符之重衣惟補葛南郡太守敝布裹身萊蕪
縣長凝塵生甑專云爲利圖物何其爽歟總而言之爵非
世及用賢之路斯廣民無定主附下之情不固此乃愚智
所辯安可惑哉至如滅國殺君亂常干紀春秋二百年間
畧無寧歲次睢咸秩遂用玉帛之君魯道有蕩每等衣裳
之會縱使西漢哀平之際東洛桓靈之時下吏淫暴必不
至此爲政之道可一言以蔽之伏惟陛下握紀御天膺期
啟聖救億兆之焚溺掃氛祲於寰宇創業垂統配二儀以

立德發號施令妙萬物以爲言獨照宸衷永懷前古將復
五等而修舊制建萬國以親諸侯竊以漢魏以還餘風之
弊未盡勛華既往至公之道斯革况晉氏失馭宇縣崩離
後魏乘時華夷雜處重之以關河分阻吳楚懸隔習文學
者尚長短縱橫之術習武藝者盡干戈戰爭之心畢爲狙
詐之階彌長澆浮之俗開皇在運因籍外家驅御羣英任
雄猜之數坐移時運非克定之功年踰二紀民不見德及
大業嗣文世道交喪先王人物掃地將盡雖天縱神武削
平寇虐兵威不息勞止未康自陛下仰順聖慈嗣膺寶曆

情深致理綜覈前王雖至道難名言象所絕畧陳梗槩實
所庶幾愛敬蒸蒸勞而不倦大舜之孝也訪安內監親嘗
御膳文王之德也每憲司讞罪尚書奏獄大小必察枉直
咸舉以斷趾之法易大辟之刑情必隱惻貫徹幽顯大禹
之泣辜也正色直言虛心受納不簡鄙陋無棄芻蕘帝堯
之求諫也宏獎名教敦勸學徒旣擢明經於青紫將升碩
儒於卿相聖人之善誘也羣臣以宮中暑濕寢膳或違請
徙御高明營一小閣遂惜十家之產竟抑子來之願不爰
陰陽之感以安卑陋之居去歲凶儉普天饑饉喪亂甫爾

倉廩虛空聖情矜憫勤加賑卹竟無一人流離道路猶且
食啗藜藿樂徹簋簠言必悽動貌成臞瘠公且喜於重譯
文命矜其卽序陛下每見四夷款附萬里歸仁必退思進
省凝神動慮恐妄勞中國以求遠方不籍萬古之英聲以
存一時之茂實心切憂勞跡絕遊幸每旦視朝聽受無倦
智周於萬物道濟於天下罷朝之後引進名臣討論是非
備盡肝膈惟及政事更無異辭纔及日昃必命才學之士
賜以清閑高談典籍雜以文咏間以元言一夜忘疲中宵
不寐此之四道獨邁往初斯實生民以來一人而已宏茲

風化昭示四方信可以期月之間彌綸天壤而淳樸尚阻
浮詭未移此由習之已久難以卒變請待琢琬成璞以質
代文刑措之教一行登封之禮云畢然後定疆理之制議
山河之賞未爲晚焉易稱天地盈虛與時消息況於人乎
美哉斯言也

化度寺故僧邕禪師舍利塔銘

蓋聞人靈之貴天象攸憑稟仁義之和感山川之秀窮理
盡性通幽洞微研其慮者百端宗其道者三教殊源異軫
類聚羣分或博而無功勞而寡要文勝則史禮煩斯黷或

控鶴乘鸞有繫風之諭
飡霞御氣致捕影之譏
至於察報應之方窮死生之變大慈

闕

運宏濟羣品極眾妙而爲言

冠元宗以立德其唯真如之設教焉若夫性與天道契協
神交貽照靈心澄神禪觀則有化度寺僧邕禪師者矣禪
師俗姓郭氏太原介休人昔有周氏積德累功慶流長世
分星判野大啟藩維蔡伯喈云號者郭也號叔乃文王所
咨郭泰則人倫攸屬聖賢遺烈夾葉其昌祖憲荊州刺史
早擅風猷父韶博陵太守深明典禮禪師含靈福地擢秀
華宗爰自弱齡神識沈靜率由至道冥符上德因戲成塔

發自髫年仁心救蟻始於壯歲世傳儒業門多貴仕時方
小學齒胄上庠始自趨庭便觀入室精勤不倦聰敏絕倫
博覽羣書尤明老易然雅有志尚高邁俗情時遊僧寺伏
膺釋典風鑑疎朗豁然開悟聞法海之微妙毛髮同喜瞻
滿月之圖像身心俱淨於是錙銖軒冕糟粕邱墳年十有
三違親入道於鄴西雲門寺依止稠禪師稠公禪慧通
戒行勤苦道標方外聲溢區中闕覩暗投欣然驚異卽授
受禪法數日便詣幽深稠公嘗撫禪師而謂諸門徒曰五
亭闕念盡在此矣頭陀蘭若畢志忘疲仍來往林慮山中

棲託遊處後屬周武平齊像往林慮入白鹿深山避時削

跡藏聲戢曜枕石漱流闕巖之下葺茆成室蘿裳薜帶闕

唯冀闕之衣餌尤餐松嘗無麻麥之飯三逕斯絕百闕爲

羣猛驚毒螫之徒潛形匿影白鹿青鸞之輩效祉呈祥每

梵音瞻禮焚香讀闕二奇禽異獸攢集庭宇俱絕闕倚畢

來俯伏貌如恭敬心疑聽受及開皇之初宏闕釋教於時

有魏州信行禪師闕明佛性大轉法輪實命世之異人爲

元門之益闕以道隱之辰習當根之業知禪師遯世幽居

遣人告曰修道立行宜以濟度爲先闕善其身非所聞也

宜盡宏益之方昭示流俗禪師乃出山與信行禪

闕

修苦

行開皇九年信行禪師被勅徵召乃相隨入京京師道俗

莫不遵奉信行禪

闕三

之

闕二

持徒眾以貞觀五年十一

月十六日終於化度寺春秋八十有九聖上崇敬

闕二

贈

帛追福卽以其月廿二日奉送靈塔於終南山下鷗鳴埵

禪師之遺令也徒眾收其舍利起塔於信行禪師靈塔之

左禪師風範凝正行業精勤十二部經嘗甘露而俱盡五

百具戒淩嚴霜而未彫雖託跡禪林避心定水涉無爲之

境絕有待之累

闕

寓形巖穴高步京華常卑辭屈已體道

藏器未若道安之遊樊沔對鑿齒而自伐彌天慧遠之在
廬山折桓元之致敬人主及遷神淨土委質陲林四部奔
馳十方號慕豈止寢歌輟相捨佩捐珠而已式昭景行乃
述銘云

綿邈神理希夷法性自有成空從凡入聖於昭大士遊

闕二

字正德潤慈雲心懸靈鏡闕蒙悟道捨俗歸真累明成照

積智爲津行識非想禪闕三觀盡三昧情銷六塵結構窮

巖留連幽谷靈應無像神行匪速敦彼開導去茲闕三絕

有憑羣生仰福風火闕妄泡電同奔達人忘已真宅斯存

剎那

闕二

淨域

闕五

樂永謝重昏

唐故都督徐州五州諸軍事徐州刺史臨淄定公

房公碑

易稱易之為書也有天道焉有人道焉故君子居則觀其象動則觀其變智以藏往感而遂通是以進退之數有方

存亡之幾可

闕

昔賈生董相懷王佐之才

闕五

命世之

闕二

字屯遭於世故擯

闕二

當年軼風電以長鳴絕雲霓而鍛

翮而樂天知命順時守道體忠信而夷險阻憑清靜以安

悔吝雖

闕

川寂其浸遠而盛德久而愈新昔之玉質金相

求益友於千載蘭闕桂馥想同氣於九原則有闕三懷庶

幾之道詳觀出處之跡可以追蹤勝業繼踵清塵者其惟

都督臨淄定公馬公諱彥諫字孝冲清河人也七世祖謚

燕太尉掾隨慕容氏闕度寓於齊土宋元嘉中分闕郡之

西部置東冀州東清闕二字繹幕縣仍爲此郡縣人至於蘭

侯又於東廣川郡別立武強縣令子孫居之丹陵誕聖祥

發慶靈虞舜受闕光啟侯服導原注壑若瀉河漢之流竦

構干雲如仰嵩華之峻闕三字植公之十三世祖也積德固

其宗祊純嘏貽其長世公侯之門必復繁衍之祚攸歸高

祖法壽宋大明中州主簿武賁中郎將魏郡太守立功歸

魏封莊武侯使持節龍驤將軍東冀州刺史薨贈

闕三字

青

州刺史諡蘭侯魏書有列傳重價香名馳聲南北宏材祕

畧兼姿文武曾祖伯祖州主簿襲爵莊武侯齊郡內史幽

州長史

闕

行州事衣

闕

訓俗露冕懷戎累仁義而成基處

脂膏而不潤祖翼年十六郡辟功曹州辟主簿襲爵莊武

伯宋安太守居繼母憂廬於墓次世承冢嫡之重門貽旌

表之貺鄉閭之敬有過知恥宗族所尊不

闕

而肅

闕

伯熊

年廿辟開府行參軍仍行

闕

州清河廣川二郡太守

闕

二

神英邁器量沈遠寢門之內捧檄以慰晨昏山澤之間單

車以清寇亂公稟元精之和氣體惇粹之淑靈心運天機

性與道合溫良恭儉應言行之闕神采風尚出儀形之表

博極圖書闕綜遺逸正經義闕時所留懷絕簡研幾下帷

覃思盡探隅奧畢詣精微或致元白之譏非止春秋之僻

吉凶禮制今古異同莫不窮覈根原詳悉指要內闕親表

達之學徒負笈擁帚質疑去惑公凝神闕二函丈無倦聲

字闕三山谷對盈自遷定齊土家已重世班懿十紀旌旗之

盛未多陳完八葉鳴鳳之祥斯在况復里稱冠蓋庭茂芝

蘭行則結

闕

連騎居則撞鐘列鼎雖范蠡貨財本

闕

卿相

陰家僕

闕

舊比封君

闕

之

闕二

公閑心閑館以風素自居

清虛味道沈冥寡欲恭敬以搏節退讓以明禮潛隱之操

始擅於州閭高亮之風日聞於海內於是羣公仰德邦君

致禮物

闕

斯辯旌

闕

盈塗郡三辟功曹州

闕

辟主簿其後

闕三

而從命公明天人之際述堯舜之道其處也將委質

眾妙之門棲神不死之地其出也將宏獎名教博利生民

舟楫可期英靈有屬州郡

闕

職

闕

其志焉然公以周隋禪

代之交紀綱弛紊亦既從政便以治亂爲懷眷言州壤在

情彌切乃整齊風俗申明獄訟進善黜惡導德齊禮雖在

鄉國若處王朝政教嚴明吏

闕

悅伏見危拯難臨財潔已

利物之

闕

不自爲德不貪之寶必畏人知開皇初頻詔搜

揚人物

闕

王出

闕

京洛致書辟召州縣并苦相敦逼公辭

以痼疾且得遂情偃仰其後隋文帝忌憚英俊不許晦跡

邱園公且

闕

維繫方應薦舉七年始入京省授吏部承奉

郎是時齊朝資蔭不復稱敎鼎貴高門俱從九品釋褐朝

廷以公望實之重才藝之優故別有此授以明則哲之舉

俄遷監察御史每杖節巡省糾逖姦慝心存

闕

六

轉授秦

州總管錄事參軍事漢陽重鎮京輔戶門管轄一方允斯
盛選尋以朝集入京與左僕射齊公總論考課之法黜陟
之方齊公對岳牧以下大相歎服其後具以公言敷奏仍

有十擢之

闕二字

非知

闕二字

主竟不能見用

闕

遷許州長葛

縣令公鎮之以清靜文之以禮樂訟以道息災因德弭百
姓感悅咸不忍欺愛之如慈親焉敬之如神明焉繼負知
歸頌聲載路解代之後吏民追思惠政樹碑頌德在長葛
秩未滿以考績

闕

異遷都州司馬此州荆鄧之郊華夷躋

雜

闕

俗殘獷

闕

情儉詖公化之以仁愛敦之以淳厚期月

之間咸知遷革尋以州廢解任言歸夜觀星象晝察人事
知天地之將閉望箕穎以載懷乃於閩山之陰結構巖穴
非唯在乎避世固亦潛以相時然大業之初始班新令妙
選賢良爲司隸刺史公首膺斯舉有詔追赴京洛公以朝
綱浸以頽壞此職亦是宏濟之一方便起而就徵攬轡登
車卽有激清天下之志於是激濁揚清風馳草偃行能之
類望景以聽升遷苛暴之徒承風而解印綬進擢者縻爵
不致謝言繩紃者受刑而無怨色自非道在至公信以被
物其孰能與於此焉旣而閩政陵夷小人道長忠言靡用

正士無施大業十一年出爲涇陽縣令未幾而遘疾粵以
其年歲次乙亥五月壬辰朔十五日景午終於官舍春秋
六十有九降生一子光輔帝唐叶贊璇璣參調玉燭皇上
情深遺烈闕二字想於夷門眷言才子便有懷於袁煥貞觀

三年十有二月迺下詔曰紀功褒德列代通典崇禮飾終
著在方策隋故司隸刺史房彥謙世襲簪纓珪璋特秀溫
恭好古明閑治術爰在隋季時屬卷懷未遂通塗奄從運
往以忠訓子義闕過庭佐命朝端業隆功茂宜錫以連率
光被九原可贈使持節都督徐泗仁譙沂五州諸軍事徐

州刺史四年十一月又發詔追封臨淄公食邑一千戶謚
曰定公禮也粵以五年歲次辛卯三月庚申朔越二日辛
酉安措於本鄉齊州亭山縣趙山之陽惟公風格凝整神
理沈邃內懷溫潤外照光景追思儀範曖似文成之圖邈
想風闕懷若相如之氣時逢戰爭術益從橫或恥問仁用
安嘉遜收文武之將墜殊山林而忘反是故銷聲貴里隱
異迷邦戢曜高門處非絕俗優柔六藝紛紛百氏采絕代
之闕文總前修之博物雖昔闕明實闕三識疏屬之神辯
闕鼠於漢朝彰委蛇於霸業無以尚也彫蟲小技曾未闕

懷時有制述將符作者致極宏遠詞窮典麗足以克諧聲律感召風雲豈唯白雪陽春郢中寡和而已永唯書契之

闕六

跡草隸之妙冠絕當時

闕二

幼年孝友惇至未離繼

祿便遭極罰裁有所識

闕

訪家人發言號絕不自勝處年

十有五出後傍宗深惟鞠養之慈將闕晨昏之禮辭違之

辰感切行路及就養

闕二

不異所生兩門喪紀並逾制度

哀毀之至聲被朝野

闕

以期功之感甘旨未嘗朋友之喪

遠近畢赴人倫之紀禮法之隆近古以來未之有也且復

留連宴賞提攜臭味登山臨水必動咏言清風朗月

闕六

滿席且得

闕二字

之孫門

闕二字

通時許慈

闕

之御指囷無倦

解

闕

未已仁義

闕

厚資產屢空以斯器望窮茲至道謂宜

俯拾青紫增曜台階而止類太邱宏道下邑遽同子產空

聞遺愛報施之理何其爽歟若夫死生者形骸之勞息殀

壽者大化之自然固知命之不憂豈居常而爲累也然行

周於物寒暑不能易其心智周於身變通不能窮其數而

靈祇多忍幽明永隔散精氣於風煙委容質於泉壤可不

哀哉於是四方同志之士百里懷音之客式遵盛烈共勒

豐碑百藥爰以疇昔妄遊蘭芷寧謂正始之音一朝長謝

師資之德百舍無從義絕賓階哀纏宿草思效薄技覲申
萬一仰惟治身之術立德之基固繫辭可以盡言豈言之
而無媿也迺爲銘粵

遐觀方冊厯選人倫名固難假德必有鄰顏閔遺迹曾史

芳塵同聲比義允屬通人於鑠通人

闕二字

膺慶司空規矩

民胥攸訓地靈貽福天齊分命世祚有徵重光無競顯允

君子丕承寵光靈河擢秀日觀含章元門味道幽谷迷方

陸沈通德朝隱康莊儀鳳潛靈彫龍振藻宏之在人一變

至道昭章

闕

訓寂寥元草文質彬彬波瀾浩浩齊物無待

隨時吐曜導俗激原訓民居要州將貽喜邦君長嘯乃眷
韜鈴還歸漁釣三徑雖阻八紘方密僂俛末班逶迤下秩
司憲邑宰循名責實御眾以寬在刑惟恤履斯異行乘闕
丕基才高位下有志無時和光偶俗誕命膺期闕揚投賈
唯茲在茲樹德不已蹈仁無數遺構有憑高門以闢眷言
上壽方期永錫載佇太階翻歸厚夕義高表墓道貴揚名
式昭文物用紀哀榮抽簪故吏制服諸生一刊園石闕二
飛聲

碑陰

公之將葬恩旨重疊賙贈優渥

闕四

公及夫人並令所司

營造馬輦各給四馬從京師洛陽殯所送至本鄉其車輅

儀仗出懷洛二州給船載運

闕道闕

力至於墓所儀從錢

闕有闕

闕二者

又發勅令以官物修補又文官式令例

無鼓角亦特給送至於葬所又於常令給墓夫之外別加

兵千功役臨葬

闕

復降勅使馳驛祭以少牢葬後爲供葬

事發勅旨行筆十有二條近代以來恩榮哀贈未有若此

者也中外姻戚海內名士并故吏門生千里赴會

闕

及州

里道俗二千餘人

隋故益州總管府司馬裴君碑銘

并序

粵惟上德希世挺生存則道照於人倫沒則名飛於史策
宜其計功伐鏤鍾鼎永貽長世昭示後昆君諱鏡民字君
倩河東聞喜人也唐虞之盛伯益控其遙原殷周以還仲
衍膺其餘慶徽則擅美當塗憲則流芳中夏金張舊業遠
謝聲塵江漢英靈多慙光價祖靖慮魏銀青光祿大夫汾
州刺史銀章青綬登高能賦揚波流惡政以鎮成父

闕一字

漢周革路大夫儀同三司晉州刺史雅道儒風聲動當世
班條布政恩結去思君上表雲氣遠膺星像虛牝與貞固

同歸愛景共嚴凝一致懸河若訥每括智囊止水澄神日
開靈鑒及擇師請益遊方問道性與稽古心照神文佩游
夏之芳塵爲潘張之益友立人之道仁義靡遺事親之德
愛敬同盡迹屈衡門聲馳上國莫府交辟公車致禮晉蕩
公受博陸之圖處阿衡之寄爲其諸子精選府寮辟爲譚
公大將軍記闕一字府中爲其語曰令德日新裴鏡民昔馬
越爲其世子辟王安期取其儀形之美蔣濟崇其府望辟
阮嗣宗重其文學之譽我貽羔鴈兼而闕一字之尋以內艱
去職旛車方駕金革在辰喪禮未宏多從權奪朝廷以君

羸瘵過甚特詔終哀感動風俗皆此類也建德初以君爲

宋王侍讀尋授記室參軍遷司錄宣政一年授吏部上士

攝少吏部研幾汲引之方遊刃銓衡之地能官在闕一咸

事無遺大吏部竟陵公卽有隨之滕王也亮拔不羣英姿

秀發重君才行深見褒獎每闕一裴楷清通之望復見斯

人開皇受禪其日除尚書在外兵郎尋改爲兵部侍郎魏

晉以還臺郎顯要官方始革揚厯是膺是非器重望闕一

無以宏斯禮秩華陽地險控御遐長蜀王秀以闕一子之

尊擁旄作鎮寮屬望重妙簡時賢以君爲西南道行臺兵

部侍郎及行臺廢除

關一
字

州總管府掾尋改益州總管府

司馬蜀王年止勝衣童心未改文武佐吏多非正人君言

必盡忠行惟直道省府之內莫不敬而憚之

關一
字

臺民部

尚書陳茂情恃惟舊志多慢下雖處行乖方莫敢違異惟

君

關一
字

理抗直未嘗順旨兵部尚書京兆杜杲每謂人曰

不值盤根錯節不表利器裴君匪躬遑監可謂美矣開皇

十六年西南夷

關二
字

從構亂君總率士卒應機致討後軍

不繫戰危喪律以三月癸丑朔十九日辛未陷於賊庭季

路結纓志無苟免溫序銜須義不卅辱永懷斯道蓋君之

平生風烈焉惟君靈府浚徹神關一開敏英畧外明沈幾

內斷培風自遠背丹穴以來儀關一氣不羣望青霄而孤

竦許劭月旦之論韞義生風黃童日下之聲乘虛效響彈

冠莫府掌記文房媚韶景以閨華嘯清風而振藻珥筆南

宮垂纓西蜀戎事之重必司善政蒐狩於是得時風霜以

之順序比明月於東曹又典午於南正眷熊掌關一重義

安馬革以輕生神邁關三峯關一構農夫輟關一而野祭

機婦捐珠而巷歌西蜀父老至于今思之君第五子太僕

少卿洛州都督關一長充上柱國翼城縣開國公勣關一

雅道於

闕二字

構丕基於鴻緒感四序之遞變觀萬物而永

言思宏遺範式昭貞石其銘曰

靈河遠派大時流光美哉地德鬱矣

闕一字

芳高門鍾鼎世

闕一字

旗常鵷鴻接翼金玉其相惟君載挺道符人俊灼灼

外明溫溫內潤瞻之忽後仰之

闕一字

峻抱樸澄清含風

闕一字

字

韻

闕二字

資

闕一字

公府馳名永懷喪制易俗申情爰掌書

記俄屬銓衡清通之譽遠嗣家聲開皇在辰萬象咸鏡靈

開尺

闕一字

典屬軍政列宿上膺中和俯咏永懷神道斯人

斯命層梁毀構靖樹

闕一字

風彫戈紀

闕一字

鼎銘功柏庭

永閼泉路斯窮九京不作萬古書忠明

闕一字

重世分茅錫

社仰嗣丕基式宏良冶絕雲使翼追風頽緒以

闕四字

胃

闕下字

太穆皇后哀冊文

維貞觀九年歲次癸未冬十月辛丑朔二日壬寅太穆皇后梓宮啟自壽安陵將祔於獻陵其日至尊親奉奠於太安宮乃使兼太尉某設祖於行宮禮也龍攢鳳啟翟輅朝陳方祇靖德圓魄虛神哀子嗣皇帝諱攀弓劍而長號想禕綸之弗御痛異宮之隔禮切分心於窮慮二南風化萬古徽音式昭史冊如玉如金其詞曰

元功盱蠡景福氤氲將開樞電且應黃雲曰惟基命於昭
德性配天不失復夏無競門德丕承華宗遞興皇家漢氏
祥發慶膺冥符世胄並會休徵帝妃北渚聖母東陵祕景
陰陵含章嬪則柔順宏範幽閑毓德率禮無違尊師罔忒
言昭圖史聲芳邦國帝錄將啟天妹言歸塗山表貺渭汭
增暉外求才淑內鑒幾微蘋蘩夕膳絲枲中闈琴瑟匪諧
冰霜慙潔道叶離明貞符兌悅潛德勿用內教爰設世罕
交泰時虧地節膺期集祉含和履正華渚降祥高禰誕聖
潛著軒象未彰靈命奄御雲衣俄飛天鏡嗚呼哀哉受終

撫運馭極乘乾物思厚德政闕承天璠尊委奠金屋虛筵
嗟故劒之無託歎房樂之徒懸嗚呼哀哉宸駕上僊玉几
垂裕率土遏密同軌畢赴背櫟陽之神宇指原陵之封樹
悼虞妃之不從遵周典而遷祔嗚呼哀哉蒼茫昭世冥漠
神心松庭幽寂隧路凝深儼龍輶而未進切鳳吹之哀吟
水滔滔而不息日黯黯而將沈百神驚而元兆遽萬國慟
而寒山陰晦重雲於畢陌結微霜於穀林嗚呼哀哉極寰
宇之儀訓播英聲於先后惟皇運之天長配靈岷而地久
流凱風於椒掖散白露於陵阜軼任姒之高蹤邁蒿華而

不朽嗚呼哀哉

欽定全唐文卷一百四十四目錄

于志寧一

讓賜地奏

論李宏泰疏

諫衡山公主出降疏

諫太子承乾書

諫太子承乾引突厥達哥支入宮書

諫太子承乾啟

隋柱國左光祿大夫宏義明公皇甫府君碑

唐故太子少保上柱國潁川定公碑

欽定全唐文卷一百四十四

于志寧

志寧字仲謚京兆高陵人高祖入關迎謁長春宮授銀青光祿大夫太宗朝官中書侍郎加散騎常侍行太子左庶子遷侍中永徽時封燕國公拜尚書左僕射同中書門下三品顯慶四年拜太子太師麟德二年卒年七十八贈幽州都督諡曰定

讓賜地奏

臣代居關右周魏以來基跡不墮行成等新營莊宅尚少

金匱要略卷之二十四
田園於臣之餘乞申私讓

論李宏泰疏

伏惟陛下情篤功臣恩隆右戚以無忌橫遭誣告事並是
虛欲戮告人以明賞罰一以絕誣謗之路二以慰勲戚之
心又以所犯若是真無忌便有破家之罪今告爲妄宏泰
卽宜戮不待時且眞犯之人事當罪逆誣謗之類罪惟及
身以罪校量明非惡逆若欲依律合待秋分今時屬陽和
萬物生育而特行刑罰此謂有傷春氣竊謂未安左傳聲
子曰賞以春夏刑以秋冬順天時也又禮月令曰孟春之

月無殺昆蟲省囹圄去桎梏無肆掠止獄訟又漢書董仲舒曰王者欲有所爲宜求其端於天天道之大者在陰陽爲德陰爲刑刑主殺而德主生陽常居大夏而以生育長養爲事陰常居大冬而積於空虛不用之處以此見天之任德不任刑也伏惟陛下纂聖昇祚繼明御極追連胥之絕軌蹈軒頊之良規欲使舉動順於天時刑罰依於律令陰陽爲之式序景宿於是無差風雨不愆雩禱輟祀今方太簇統律青陽應期當生長之辰施肅殺之令伏願暫迴聖慮察古之言儻蒙垂納則生靈幸甚

諫衡山公主出降疏

臣聞明君馭歷當俟獻替之臣聖主握圖必資鹽梅之佐所以堯詢四岳景化洽於區中舜任五臣懿德被於無外左有記言之史右立記事之官小大咸書善惡俱載著懲勸於簡牘垂褒貶於人倫爲萬古之範圍作千齡於龜鏡伏見衡山公主出降欲就今秋成禮竊按禮記云女十五而笄二十而嫁有故二十三而嫁鄭元云有故謂遭喪也固知須終三年春秋云魯莊公如齊納幣杜預云母喪未再期而圖婚二傳不譏失禮明故也此則史策具載是非

歷然斷在聖情不待問於臣下其有議者云準制公除之後須並從吉此漢文創制其儀爲天下百姓至於公主服是斬縗縱使服隨例除無宜情隨例改心喪之內方復成婚非唯違於禮經亦是人情不可伏惟陛下嗣膺寶位臨統萬方理宜繼美義軒齊芳湯禹宏獎仁孝之日敦崇名教之秋此事行之若難猶須抑而守禮況行之甚易何容廢而受譏此理有識之所共知非假愚臣之說也伏願遵高宗之令軌畧孝文之權制國家於法無虧公主情禮得畢則天下幸甚

諫太子承乾書

臣聞克儉節用實宏道之源崇侈恣情乃敗德之本是以
凌雲槩日戎人於是致譏峻宇雕牆夏禹以之作誠昔趙
盾匡晉呂望師周或勸之以節財或諫之以厚斂莫不盡
忠以佐國竭誠以奉君欲使茂實播於無窮英聲被乎物
聽咸著簡策以爲美談今所居東宮隋日營建覩之者尚
驚其侈見之者猶嘆其華何容此中更有修造財帛日費
土木不停窮斤斧之工極磨礱之妙且下匠官奴入內比
者曾無監管此等或兄犯國章或弟罹王法往來御苑出

入禁闈鉗鑿緣其身槌杵在其手監門本防非慮宿衛以
備不虞直長旣自不知千牛又復不見爪牙在外廝役在
內所司何以自安臣下豈容無懼又鄭衛之樂古謂淫聲
昔朝歌之鄉迴車者墨翟夾谷之會揮劍者孔子先聖旣
以爲非通賢將以爲失項聞宮內屢有鼓聲太樂伎兒入
便不出聞之者股慄言之者心戰往年口勅伏請重尋聖
旨慙懃明誠懇切在於殿下不可不思至於微臣不得無
懼臣自驅馳宮闕已積歲年犬馬尚解識恩木石猶能知
感所有管見敢不盡言如鑒以丹誠則臣有生路若責其

忤旨則臣是罪人但悅意取容臧孫方之疾疢犯顏逆耳
春秋比之藥石伏望停工匠之作罷久役之人絕鄭衛之
音斥羣小之輩則三善允備萬國作貞矣

諫太子承乾引突厥達哥支入宮書

臣聞上天蓋高日月以光其德明君至聖輔佐以贊其功
是以周誦升儲見匡毛畢漢盈居震取資黃綺周公抗法
於伯禽賈生陳事於文帝莫不殷勤於端上懇切於正人
昔鄧禹名臣方居審諭之任疏受宿望始除輔導之官歷
代賢君莫不丁寧於太子者良以地膺上嗣位處儲君善

則率土霑其恩惡則海內罹其禍近聞僕寺司馭爰及駕
士獸醫始自春初迄於夏晚恒居內役不放分番或家有
尊親闕於溫清或室有幼弱絕於撫養春則廢其耕墾夏
又妨其播植事乖存愛人有怨嗟且突厥達哥支等咸是
人面獸心豈得以禮義期不可以仁信待心則未識於忠
孝言則莫辨其是非近之有損於英聲昵之無益於盛德
引之入閤人皆驚駭豈臣庸識獨用不安臣下爲殿下之
股肱殿下爲臣下之君父君父以存撫爲務股肱以匡救
爲心是以苦口之藥以奉身逆耳之言以安位古人樹誹

謗之木以求已誓懸敢諫之鼓以思身過由是從諫之主

鼎祚克昌復諫之君洪業墮墜

謹按此從舊唐書采錄文苑英華貞觀政要所載與

此不同附載於後文苑英華人有怨嗟下云願崇儒敬業訪道稽疑則品物增輝懷生欣怍今司經見無學士供奉未有侍讀伏望時因視膳奏請置人所冀講席談筵務盡忠規之道披文摘句方資審諭之勤臣又聞臣之事主必盡誠愬君之進賢務求忠讜伏惟殿下養德儲闡理以端靜爲務恭膺守器必以學業爲先經所以立行修身史所以諳識成敗雅誥既習忠孝乃成傳記方通安危斯辨知父子君臣之道識古今鑒戒之規經史爲先斯乃急務至於工巧造作僚吏直司實爲末事無足勞慮臣以庸賤獻替是司臣而不言負譴聖日言而獲罪是所甘心伏願留意經書簡畧細事一蒙採納萬殞無辭乞降儲明俯察狂瞽貞觀政要人有怨嗟下云儻聞天聽後悔何及又笑厥達哥支等咸是人面獸心豈得以禮義期不可以仁信待心則未識於忠孝言則莫辨其是非近之有損於英聲昵

之無益於盛德引之入閤人皆驚駭豈臣庸識獨用不安
殿下必須上副至尊聖情下允黎元本望不可輕微惡而
不避無容畧小善而不爲理敦杜漸之方須有防萌之
術屏退不肖狎近賢良如此則善道日隆德音自遠

諫太子承乾啟

臣聞堯稱稽古功著於搜揚舜曰聰明績彰於去惡然開
元立極布政辨方莫不旌賁英賢驅除不肖理亂之本咸
在於茲况閭宦之徒體非全氣便蕃階闥左右宮闈託親
近以立威權假出納以爲禍福昔易牙被任變起齊邦張
讓執鈞亂生漢室伊戾爲詐宋國受其殃趙高作奸秦氏
鍾其弊加以宏石用事京賈則連首受誅王曹掌權何寶

則踵武被戮遂使搢紳重足宰司屏氣然順其情者則榮
逮幼冲迂其意者則災及襁褓爰暨高齊都鄴亦弊閭官
鄧長禹位至侍中陳德信爵隆開府外干朝政內預宴私
宗枝藉其吹噓重臣仰其鼻息罪積山岳靡挂於刑書功
無涓塵已勒於鐘鼎富踰金穴財甚銅山是以家起怨嗟
人懷憤歎骨鯁之士語不見聽謇諤之臣言必被斥齊都
顛覆職此之由向使任諒直之臣退佞給之士據趙魏之
地擁漳滏之兵修德行仁養政施化何區區周室而敢窺
覷者哉然杜漸防萌古人所以遠禍以大喻小先哲於焉

取則伏惟殿下道茂重離德光守器憲章古始祖述前修
欲使休譽遠聞英聲遐暢臣竊見寺人一色未識上心或
輕忽高班或陵轢貴仕便是品命失序綱紀不立取笑通
方之人見譏有識之士然典內職掌唯在門外通傳給使
主司但緣階闥供奉今乃往來閤內出入官中行路之人
咸以爲怪伏望狎近君子屏黜小人上副聖心下允衆望
謹啟

隋柱國左光祿大夫宏義明公皇甫府君碑

夫素秋肅煞勁草標於疾風叔世艱虞忠臣彰於赴難銜

須授命結纓殉國英聲煥乎記牒徽烈著於旂常豈若覺
起蕭牆禍生蕃翰強踰七國勢重三監其有蹈水火而不
辭臨鋒刃而莫顧激清風於後葉抗名節於當時者見之
宏義明公矣君諱誕字元憲安定朝那人也昔立效長邱
樹績東郡太尉裂壤於槐里司徒胙土於彤門是以車服
旌其器能茅社表其勲德銘功衛鼎騰美晉鐘盛族冠於
國高華宗邁於樂郤備在史牒可畧言焉曾祖重華使持
節龍驤將軍梁州刺史潤木暉山方重價於趙璧媚川照
闕曜奇彩於隋珠祖和雍州贊治贈使持節散騎常侍車

騎大將軍儀同三司膠涇二州刺史高衢將騁遽反追風之足扶搖始搏早墜垂天之羽父璠使持節驃騎大將軍開府儀同三司隨州刺史長樂恭侯橫劍柱桓威重冠軍枿瑞蕃條聲高渤海公量包申伯稟嵩山之秀氣材兼蕭相絳昴緯之淑精據德依仁居貞體道含章表質詎持變於朱藍恭孝爲基寧取訓於橋梓鋒剗犀象百鍊挺於昆吾翼掩鴛鴻九萬奮於溟海搏韜骨產文瞻卿雲孝窮溫清之方忠盡匡救之道同何充之器局被重晉君類荀攸之宏圖見知魏主斯故包羅眾藝囊括羣英者也起家除

周畢王府長史榮名蕃牧則位重首僚袷服睢陽則譽光
上客旣而蒼精委馭炎運啟圖作貳邊服實資令望授廣
州刺史悅近來遠變輕詔於雕題伐叛懷柔漸淳化於緩
耳蜀王地處維城寄深磐石建旗玉壘作鎮銅梁妙擇奇
材以爲寮佐授公益州總管府司法昔梁孝開國首辟鄒
陽燕昭建邦肇徵郭隗故得馳令問於碣館播芳猷於平
臺以古方今彼此一也尋除尚書比部侍郎轉刑部侍郎
趨步紫庭光映朝列折旋丹地譽重周行俄遷治書侍御
史彈違糺慝時絕權豪霜簡直繩俗寢貪競隨文帝求衣

待旦志在恤刑呪網泣辜情存緩獄授大理少卿公巨細
必察同張季之聽理寬猛相濟比于公之無冤但禮闈務
殷樞轄寄重允膺此職實難其人授尚書右丞洞明政術
深曉治方臧否自分條目咸理丁母憂去職哀慟里閭隣
人爲之罷社悲感衢路行客以之輟歌孝德則師範彝倫
精誠則貫徹幽顯雖高曾之至性何以加焉尋詔奪情復
其舊任於時山東之地俗阜民澆雖預編民未行聲教詔
公持節爲河北河南道安撫大使乃賜米五百石絹五百
匹公輜軒布政美冠皇華之篇擁節觀風榮甚繡衣之使

事訖反命授尚書左丞然并州地處參墟城臨晉水作固
同於西蜀設險類於東秦實山河之要衝信蕃服之襟帶
授公并州總管府司馬加儀同三司公贊務大邦聲名籍
甚精民感化黠吏畏威屬文帝劍璽空留鑾蹕莫反楊諒
率太原之甲擁河朔之兵方叔段之作亂京城同州吁之
挺禍濮上雖無當璧之兆乃懷奪宗之心公備說安危具
陳逆順翻納魏勃之策反被王悍之災仁壽四年九月溘
從運往春秋五十有一萬機起殲良之歎百辟興喪予之
悲切孔氏之山頽痛楊君之棟折贈柱國左光祿大夫封

宏義郡公食邑五千戶諡曰明公禮也喪事所須隨由資
給賜帛五千段粟三千石惟公溫潤成性夙表白虹之珍
黼黻爲文幼挺雕龍之彩行已窮於六本蘊德包於四科
延閣曲臺之奇書鴻都石渠之祕說莫不尋其枝葉踐其
隩隅譬越箭達犀飾之以括羽楚金切玉加之以磨闕救
乏同於指囷親識待其舉火進賢方於推轂知己俟以彈
冠存信捨原黃金賤於然諾忘身殉難性命輕於鴻毛齊
大小於沖襟混寵辱於靈府可謂闕四冠冕時雄者也方
當亮采泰階參綜機務豈謂世逢多故運屬道消未展經

邦之謀奄鍾非命之酷世子民部尚書上柱國滑國公無

逸以爲邢

闕一

之下

闕三

仲之

闕三

之東誰知子孟之墓

乃雕戈勒石騰實飛聲樹之康衢永表芳烈庶葛亮之隴

鍾生禁之以樵蘇賈逵之碑魏君歎之以不朽乃作銘曰

上闕

時翼主膺期佐帝運策經綸執鈞匡濟門承積慶世

挺偉人夜光愧寶朝采慙珍雲中比陸日下方荀抑揚元

闕

申裾朱邱名馳碣石聲高建禮珥筆憲台握蘭文陛分

星裂土建侯開國轉藉正人相資懿德中臺輟務晉陽

闕

桐成師構難太叔興戎建德効節夷吾盡忠命屯道著身

歿名隆牛亭始卜馬鬣初封翠碑刻鳳丹旆圖龍煙

闕下

唐故太子少保上柱國潁川定公碑

闕三十之功至如三傑贊泗水之基十臣崇鎬宮之業遂

使體元垂拱成俗

闕十之九

闕一字

股肱屬

闕二字

之期預

闕一字

試之謀猷參隨山之經啟位隆政本榮重分符騰芳五牛

之旌勒功九龍之鼎

闕二字

潁川定公矣公諱良字仲良潁

川人也昔獻子輔政名重六卿師伯執鈞譽高三事實潁

川之望族乃鄴邑之華宗者也代有名臣家傳懿德冠冕

被乎青史功業著於丹

闕一字

茂績洪勲可畧言矣曾祖演

魏征虜將軍恒州刺史受律清廟威震細柳之軍分竹大
藩聲冠雲中之守祖褒魏侍中周使持節開府儀同三司

原涼二州總管

關二
字

少保

關二
字

貞公從政

關二
字

六官以宏

政本贊化

關一
字

路三孤以闡皇猷父紹周昌樂郡守隨儀

同三司驃騎將軍衛尉少卿金崖縣開國公職典五戎

關九

字含英聲冠於棘

關一
字

惟公稟氣

關一
字

和降神靈嶽含章

毓德敬業居

關一
字

立身極於九言追孝盡於三道稽覽握

河之異說盡性知微旄頭嵩

關十
六字

濯清江辯溢談叢若長

河之瀉砥柱類子將之甄

關一
字

俊造俟以彈冠方林宗之

題目通賢佇以結綬可謂衣冠之領

闕十

學生仁壽

闕一字

年被舉授吏部朝散郎習業璧池譽光函丈策名禮閣聲

動周行大業元年除河東郡司功書佐九年

闕十
四字
謁闕一

對揚丹陛風範映於簪纓敷奏青蒲韶音振於金玉百寮

爲之矚

闕一字

九流於焉傾首十二年丁父憂同高柴之泣

血三年類曾參之不食

闕一字

日對風樹而愈感踐霜露而

增哀時屬金鏡潛光望夷有弑酷之禍玉繩掩曜成周致

蒙塵之災於是四海混淆九圍板蕩我高祖乘時撫運出

震握圖膺五運之寶符定九牧之神鼎元冠紫綬賁帛嘉

於琳瑯裂土剖符寵命屬於翹楚乃授公銀青光祿大夫

馮翊郡丞京師擁叛殷之徒布

闕一字

野之眾率怨秦之卒

拒霸上之師地陣箕張佳兵於是喪律天羅雲布

闕一字

池

所以失險公運制勝之謀當疇庸之賞加左光祿大夫賜

物七百段授大理少卿

闕一字

斯三

闕一字

罷人絕於嘉石察

茲五禁冤氣散於員扉三年奉使入蜀勅便宜從事公傳

檄而伏冉駹折簡而降彭濮遂使斯榆稽首庸蜀順化太

宗

闕一字

膺

闕三字

敷化陝服握兵符以清國步施文德以格

遠人公與行臺僕射屈突通禮部尚書溫大雅或竭忠以

匡多難或勵行以革頽風或博識該於石渠或緝藻麗於

闕二 所以特降詔旨令事府幕尋授陝東大行臺左丞五

年判天策府從事其年劉黑闥薦食三魏吞噬兩河爰詔

中權以申薄伐以公爲元帥府長史公陳擊員破方之畧

建塞井滅竈之謀似白起之拔夷陵如柴闕一之屠參合

策功行賞授上柱國賜闕一十人物六百段復攝天策府

司馬獫狁孔熾背約違盟騎入蕭關兵屯洵邑主上情存

綏撫未動干戈令公銜命虜庭示其禍福公曉之以逆順

喻之以安危若數項王之十誓似責息侯之五犯遂使尸

逐膜拜谷蠡屈膝既立和戎之功遂降殊常之賜又攝吏

部侍郎九年復轉陝東大行臺戶部尚書其年又除安州

大都督貞觀元年詔授戶部尚書三年改除刑部尚書施

七教以

闕一字

人掌五刺以

闕一字

獄司會之職尤重常伯之

望愈隆秦川大藩天

闕二字

鎮首席之任本藉英才授公右

光祿大夫秦川都督府長史總檢校

闕一字

府事封潁川縣

開國公昔膠西爲國相之者仲舒梁孝

闕一字

藩輔之者長

孺

闕五字

之業光磐石之宗以公方之彼有慙德庶輔仁無

爽調一氣於泰階

闕十字

豈謂素王入夢忽悲辰已之年豎

子爲災翻厄膏肓之疾貞觀十一年遘疾薨於安興里第

春秋五十七昔柳莊長逝衛喪

闕十字

今方古異代同傷詔

贈兵部尚書餘官封並如故諡曰定公禮也其年十一月

五日遷厝於雍州三原縣宏化鄉永徽五年詔贈太子太

保

闕五字

公雅量汪汪澄波瀾於萬頃宏材鬱鬱挺棟

闕一字

於千尋以

闕一字

禮爲隄防將仁信爲介胄漢考故事首問

於伯仁晉訪舊章先請於武子偶潘而稱趙璧

闕二字

而

字仙舟牆仞難踰遠方日月芬芳可習近譬芝蘭家行著

於鄉閭美譽滿於簪紱積善餘慶人物邁於三

闕一字

庭訓

有方世德光於萬石

闕一行字

重一時

闕一天字

一地

遊瑩湮

闕一庫字

寒來暑往墓入齊宮所以勒徽烈於豐碑

樹華表於神道乃爲銘曰

闕一精字握圖赤

闕一表字

震翦商功立開

闕二盛字

若木分枝

闕一原字

得姓獻子匡國司空輔政門挺台輔世誕英哲三

相之昆五侯之葉金聲玉振蘭芬冰潔節固捐雲

闕二員字

員

闕一世字

逢運否時遇國屯玉

闕二跡字

金雞失晨黃道積霧

絳闕飛塵寶焚崑岫鼎沒泗濱電照興王河清啟聖下截

四海上齊七政氛靜地興雲開

闕二業字

預鍊石功參佐命

擁節劍門

闕一字

官列棘位亞八柄聲高六職始司天憲爰

掌邦則鳴玉趨朝析珪開國駸駸隙駒滔滔逝水寶喪珪

壁梁摧杞梓儵

闕五字

蒿里魂掩一邱名傳千

闕二字

墳已卜

滕室初開

闕一字

馬

闕一字

步廣柳徘徊舟遷巨壑水淺蓬萊

勒茲琬壁長旌夜臺